

四庫全書

集部

欽定四庫全書

文溪集卷十二

宋 李昉英 撰

祭文

祭許象州文

維淳祐十年歲次庚戌二月朔越祭日門人朝散大夫
李某謹以清酌告於近故判府朝議鈍齋許公先生鈍
齋之學本源一誠文最近古誠之著形政先及物誠之
流行問無不知惟誠故精事至能應惟誠故明誠則無

欲水藥自清誠則無營軒冕甚輕師道自任南海橫經
曾入範模一一王成士德之深共祠之費至今朔望羅
拜於庭絃歌東莞課試始程亦崇殿祠書閣崢嶸菊坡
西山皆極口稱才可經綸位不公卿既踰七袞乃僅雙
旌輟俸廩士食續貢英藻飾泮宮百廢並興米入斛減
鹽出衡增寧捐公家以寬遠氓曾未期月洋乎政聲老
不廢卷細書如蠅斯文之厄泰山俄傾志未盡伸用未
及宏夫人惜嗟而况諸生某少撰杖屨早蒙旦評誨猶

藥石愛猶父兄猶記厦旃薦公姓名年貌幾何清問親
聆未幾去國竟負師承靈輻來東酌灑涕凝返築未能
何敢不銘伏惟尚饗

祭鍾子鴻文

維年月日朝散大夫直秘閣李某敬奠於故友堂長秘
校子鴻之靈潮號士區君名最早昂藏標度磊砢胃抱
天文地理瞿曇莊老博識其書妙處精到桂湘閩浙江
淮蜀道名山古迹窮極幽討文窺先秦詩軋郊島長章

鉅篇奮筆一掃小奚蹇驢輕裘短帽掀髯揮麈廣座傾
倒所至交其豪傑諸老愛如至寶餅粟屢空充然養浩
斗酒孤酌絲桐一操不屑意於科舉趣林泉而高蹈樂
窩之叟茹芝之皓喜方外之散侶對王公而睨傲達觀
大方齊物自號希年少一素無病惱臥纔數日遽以訃
告幸有諸郎收拾遺藁某三十年間情篤交好日從吾
游探索理與並者亾矣可勝悲悼寸心惘惘一奠草草
尚享

祭廣帥右史方鐵菴大琮公文

厥今人望若晨星稀公老遠播天復奪之豈惟廣人之
悲海內善類蓋莫不歔歔也嗚呼公之學探聖門之微
公之文根理窟而奇靜者其性而敬以持暄日霽風接
物怡怡見義勇為鐵石不移敢言動天無愧拾遺使部
其鄉肯故人私益海旂幢前誰五朞精神筋力畢竭於
茲器古樂成幅巾深衣鄉飲凡三動中禮儀齋廬閔閔
書閣巍巍玉女青衿賢哉帥師牘累千言判墨淋漓兩

造息爭曉之片辭雪軫爾寒荒恤爾饑手拊遐氓父母
其慈崇堂大榭闢園東西杖屨婆娑民共教嬉突兀軍
門雄視南維庫曰備安貯緡不貲為此州千年計而百
廢必治子產之仁校人猶欺孝肅之明吏計得施人知
公心如玉無疵大書連篇幾德政碑萬人香火在在生
祠蓋信之久德之深不待其去而後思詔從洪都將以
公歸素無病惱一臥不支語音朗然易簣之時面貌如
生卒襲之尸所養又可知也某疇昔嘗察今巢一枝肺

肝不隔真相規商評古今竟日塵揮公不可作何所
質疑酒落涕俱世少子期

又路祭方右史文

輶車東浮兮黃水之灣傾城挽送兮積涕回瀾魚龍泣
護海山慘顏惡人多壽兮賢者不使之生還天不可問
兮時事愈難十年締交兮相照膽肝色笑若平生兮夢
寐之間羅浮之約付渺茫兮冷月空山想像蒼蚪於炎
洲兮一酹招魂

墓誌銘

林隱君墓誌銘

昔之以卓行名不必皆仕者也懿於一念竒於一節太史氏筆之則聞滅沒無傳亦多矣南海林君鄉曲稱好人焉閭其名端甫其字訥然言頽然貌而所存踰人遠甚不心乎利名不色乎喜怒不耳乎人之過屋闔閭中惡其囂闢隙地於後窠花盆荷觀魚狎鶴寄意塵表或窮年不出戶妖卒譟城下官委之登陴執戈為里閭先

時窶民窘食指困以給有述前古吉凶人明驗可為世
勸戒者君模本散布費不貲不靳已樂善且欲夫人皆
為善已不敢為惡且欲夫人皆不為惡用心類如此安
然一生七十有一歲而終將以寶祐七年八月甲申窆
之於番禺縣義官山子一人名洪娶余女弟者拜且泣
以銘請可書於其人不於其姻曰

秉彝之真古之遺民茂其後昆此為種德之根

學士林君墓誌銘

君諱植字建之譜系古汴名閥也國朝南渡初乃先世
著作郎佐郎俛始徙其族浮光絕復規菟裘遂定居於
閩之長溪厥後簪纓代不乏人如家汴時迨君之曾大
父坦隨季父宦遊南海遂之番禺家焉坦生君之王父
清臣清臣生君之皇考申早聲場屋為庠序冠冕儷於
扶風氏生君甫髫齡夙穎悟暨長娛色養必愉必婉以
至於失怙恃哀瘠終喪無嘉容且終其身濡露履霜之
思弗少替噫孝已夫孝為百行原宜乎君之行著於鄉

咸曰義人也同胞五人有鵲原急難君屢蹈死弗顧親黨里閭有窶不自賑者有及期不能婚嫁者君罄所蓄賑之茲皆厚於事親故推其餘以往所薄者厚也亦宜使假君以年則強為善當益充惜也其數七七而止寶祐甲寅正月初五日歿於正寢易簀之際作數詩偈皆蛻生死語悲夫君室隴西氏子元中弱冠嗜讀文婚於王牒時湑之女女二人長適予之長孫亨寶次將筭戊午七月辛酉龜筮襲吉其孤泣血托檣窆於郡之永泰

里虎欄之原祔先塋也余識其邱隴銘曰

君義人孝天性世茂閥喜余慶宅大宵閱魂永櫬拱兮
後昆盛

雜著

韶石說送曲江趙廣文

韶盡善之樂也以名州嘉矣名之則昉於唐初去舜之
時如此其遠也山有異狀石耆老相傳嘗於此九成焉
故石之形肖之其說甚荒唐無稽粵嶺秦始通南巡狩

故未必至此然聖人聲教之溥如日月所照霜露所墜
粵當舜之世獨不在舜之天地中乎甚矣聖人之德感
人之深且久矣後乎舜千有餘歲季札觀樂三歎不已
夫子聞遺音肉食焉而不味至於今又千有餘歲而石
其思廟其依常隱然在人心舜何以得此於州之人州
之人何以不能忘於舜也孰謂州之人非其遺民乎則
此石特人心感觸之一機不必致疑可也教授趙君崇
禋既模南海禮樂器以文丁莫且將樂於有虞氏之祠

以實是州之名好古敏以求之者也舜何人也有為者亦若是此當求之於金石絲竹之外趙君淑諸生而古其心必有道矣淳祐八年二月朔

送邵淑

肉食者得良客難尚矣象床之諫迹是而心差傾坐之琴人高而行穢欲避正堂夫誰能當况治獄官乎館尤難於客貧者因以貨愚者為所賣卓然自立之人事決之心揆之理得矣彼既無所容其欺假托焉於貨主人

之公見偶與彼之私情暗合則人競趨之矣雖身賢而
奚以白於人為累豈細哉余同年生顧君雲仕於時為
郡理狴犴事廉平聲孚於吏民三年矣而未聞有客也
一日邵君淑來訪銜袖有詩問奚自曰顧君館舍也語
叩其隱其來纚纚心敬之不專章顧君賢究所自樹能
不以一介輕取與節可尚也他日得其位行其志操守
可知行窩將出領可無言以分一中造化心上經綸歸
而求之家有餘師

贈懷集莫貢士

不見莫君瑞應八年忽叩門訪小隱留之對荷花細酌
因談懷集產水晶石瑩明特異惜吾邑無能政治之者
列之几案供拊玩清寒照人亦天成奇物也余曰君亦
猶是夫一日遇良工具眼稍加琢磨即成美器矣時有
龍舟躍至小溪君喜甚舉大白滿引淳祐十年夏五月
朔

贈香山王公

先人與香山王公為莫逆交余兒時撰杖屨侍左右見其情好親密如兄弟先人下世今九年執友凋幾盡獨翁一箇在扁舟遠遠入城敘契闊余適有季弟之戚不能款曲陪色笑而遽辭歸使人感慨不忍別翁六十有九強健不少衰許明年重來必不渝此盟也

贈傅神張森

建張材叔以能模寫晦菴翁名江湖間藝工也而多從名公卿游氣象猶士也非若世之庸手但能看人顏面

弄粉墨探理義之精微豈不有得於公之心也哉余曩
使建將繪公像問孰能之者皆首稱材叔後致之果奇
筆也別十餘年忽來訪山居技益老老益窮南山數千
里逐食役役無寧歲蜀僧之靄傳神得妙柳仲塗謂其
至藝天與纖無差忒寫太宗龍顏天為之笑寵榮冠一
時品題連篇不止一仲塗而材叔至今不遇何耶遇不
遇有命焉歸尋舊隱集西山數老宿褒字遺子孫足以
不朽孰謂材叔不遇哉淳祐十年端午日

送相士朱杞

士大夫贈相者之言多譽喜其美已也相者對士大夫之言多佞望其利已也彼此交相悅遂無是非之心俗之千古類如此或薦談相朱翁杞來曰此以其眼得品題於諸老者袖出復齋西山遺墨而信意其見必真守必固試歷指坐客使鑒別則多減而少否乃心果無所利果無所隱乎忽以將東歸告不贈之覲而言之乞褒字之為惠不費吾何靳懼同乎流俗而不自拔也故不

敢

從學者題名疏

李子先經義知名湖海間尤長於論策訓經生固其本色賦友欲師其後場之文無不可者先疏來學者姓名豈若世之有求於人者哉蓋欲知其為何人耳

李子先春

叟字也

諭鄉飲酒行禮者

某承乏此邦愧無善狀惟於風教所關不敢後已涓吉

旦迎賓僎介於庠行鄉飲酒將與多士共興禮遜此蓋
以古風相期待也禮云禮云豈虛文之謂揖遜升降進
退周旋亦可以驗其人平日之所存禮之有儀所主者
敬儀之不肅斯焉取斯行禮之日執事者各供乃職在
列者各謹威儀頭容必直手容必恭足容必重毋惰以
羞於傍觀毋譁以亂我邊豆德音孔昭視民不忒凡我
同志敬之毋忽

諭鄉飲酒觀禮者

某講行鄉飲率由古禮俾邦人皆得寓目焉政有望於
相觀而善也動作有法容止可觀執事者固在所謹然
觀者亦當整襟正視屏氣肅容攝以威儀共成嘉禮倘
或跛倚謔笑是干大禮以自取輕此豈真好禮之士哉
觀禮者固欲觀行禮者之敬忽而觀禮者之敬忽行禮
者亦於是而觀焉

諭峒長文

有子曰其為人也孝弟而好犯上者鮮矣不好犯上而

好作亂者未之有也

善事父母為孝善事兄長為弟犯上是干犯在上之人
作亂是為爭鬪悖逆之事蓋人能孝其父母敬其兄長
便識道理知名分少有犯其上者既不犯上必不肯作
亂大凡世間作犯上作亂底事即是不孝順父兄底人
若是孝順父兄底人便不肯做犯上作亂底事有子之
言最為親切然人雖至愚未有不可化者監司郡守纔
見有一二梗化之人便一切待以非類加以刑戮他既

冥頑無知而長民者又無以開諭訓誨之使誤入於惡者終無自新之路良可憫也今進爾父老於庭諭以此言爾其歸告鄉黨子弟宜細思父母所生我者須當孝順兄長同胞而先我者須當敬遜則此心和順自不為惡汝等得與父母兄弟妻子同樂官司亦得與田里相安豈不甚美其有暴狠不率者則是孟子所謂禽獸而非有子所謂人也國有常刑後悔無及

文溪集卷十二

欽定四庫全書

文溪集卷十三

宋 李昉英 撰

詩

五言古詩

送廣帥趙平齋汝暨解印趨朝

海瀕老同年五載依宇下春風舞蓑笠愛日曝田舍喜
無撞塘吏追逐款段馬劇談許條褐得趣公餘暇達官
來三逕小隊隣翁詫明公傑俊人麟族稱大雅典刑樣

諸老曾次郁醞藉西派溯其源境物入陶寫才高事無
難隻手擘太華乘軺始踰嶺風采賢使者堂堂開大閫
部屬肅鞞帕臺端有老蜮闖影含沙射孤忠冕旒知還
許河內借鈴齋安獨處冷淡閑僧夏例錢推不受金貝
視土苴首祠酌泉翁坐使饕俗化葭萌細摩拊生意被
原野循良渤海遂平理潁川霸威風戢偷竊德意銷詭
詐能令颶母伏默禱雨師灑開倉散窮閭儉歲低粒價
貢場宏敞拓芘士千間屢歷觀古賢牧美政公其亞讒

夫真枉了有識共唾罵君子竟何傷
徽譽愈膾炙詔還九棘班明發不俟
駕傾城送津亭牽纜不忍捨老夫前
致辭再拜進離筭立朝要敢言切勿
效啞啞此行衆所望磐石鞏宗社

送荆門王廣文之官

京都士如雲一見知好修未嘗廣文
飯已替肉食謀災門恥曳裾漫郎肯
從游驚座吐倔奇倚塵覺我羞窮邊
人憚之長笑驅行舟遠烽亂夕烟戎
馬驕高秋清野空

子衿叢棘荒半流此去欲何之幕府應拔尤吾道豈空
談取勝在一籌獻馘早歸來平步班瀛洲

久住白雲呈鎮長老

桑下戒三宿我此尚留戀曹溪悟一宿我復無知見鎮
公房遜客所須如執券園丁曉供茹行者時灌硯飯奴
更芻馬紙帳費香篆主人真好事應答色無倦欲歸興
未闌欲住面有覲飛錫肯三還亦有伊蒲饌

遊峽山和東坡韻

雙虬挾泓玉輿入百轉灣向無長公詩草木今何顏此
山二百年偃蹇客往還長風駕余舟老人急開關逢迎
欠高僧喜有識面山平生癖幽壑便合茅三間君命何
敢留歸棹隨賜還慚愧和光翁笑指青童鬟

酌別張子元二首

并序

子元已注今年班籍去鵬余以言職免歸子
元不待引見毅然相隨南還茲再入京送之
至鑒空閣下用東坡韻酌別

去冬初去國逆旅等順境禍機衆危之沙蜚伺人影拂
衣肯同歸荒驛燈夜永幸脫妖墓口黑月重磨鏡勤君
再行役我愧心耿耿陛下皇明穹賢聚纖邪屏石渠盛
此士豈復松廳冷胷中貯奇策可以靖邊警平生羞輶
駒看取囊露穎堂堂曲江翁芳躅在梅嶺

其二

南士如君幾妙處方寸境撐腸五千卷落筆擅三影喜
談狂朱雲恥作諛谷永憂時點髭雪未肯疎鑷鏡摩挲

匣中龍起視斗牛耿每同畫灰語寒夜僮僕屏吾儕期
歲晏世俗任炎冷江亭揮別酒謔笑鬪機警景文兄弟
情畝異禾同穎日邊多便驛頻書來越嶺

重九遊鬱孤臺和座客韻

座上多俊人奇倔角拔犀追風颺館游鼉鳴玉龍嘶夕
陽催歸鞭更酌樽重携懷開鉤鉤簾語合印印泥似與
花神期拈出糕字題壯哉千尺臺虎踞譙之西枰中十
萬家一目城市低乘風巾可橋取月箸可梯豪氣壓崆

峒雙月照虹溪響山慨懷古妙句吾家雞邦人趑趄頭
壺榼山之蹊最喜秋事成千畝黃雲齊

是日至馬祖巖和前韻

九秋天地香贛產饒木犀登高詣其巔風健戲馬嘶偷
得一日閑古錦奚奴攜秋陽閣霏雨飛蓋換障泥舉揚
馬祖禪拂摩老坡題菊萸勸人飲猛吞玉東西凭闌視
九州莽蒼烟水低如何昌黎翁華嶺須縛梯野性淡無
嗜所樂惟山溪每羞名利區得失爭蟲雞意行契真趣

荒苔踏成蹊嘉辰且盡歡聚散或不齊

肇慶府倅王庚應平反廣府帥司冤獄詩以紀

其事

人生天地間本是同胞出貴賤與賢愚分殊而理一上
帝立君師朝廷設官職凡百有司存各欲盡其責一或
無人心何以順天則廣南十四州官吏幾滿百公道孰
扶持田野多菜色大桀作威福小桀肆蟲賊周興而爪
牙郤超而賓客君祿君忍欺天民天弗恤貪饕事篋苞

殘忍尚微纒可憐田舍翁駢首膏斧鑕可憐富家兒鞭
背遭黥墨怒氣劇炎火讒言易轉石恩門甘仰面墻間
爭屈膝喑啞一世人天高雲霧黑豈無賢大夫留此一
綫脉堂堂西蜀翁憤氣填胸臆尚友周濂溪拙矣謀身
策念我同胞人罹此操戈厄苦語為平反片言天可質
細閱拙錄篇事事皆陰隲孟子謂非人由其無隱惻此
翁仁者勇姦諛誅以筆天道本昭昭彼巧竟何益吾皇
本好生析楊西列棘安得百于公落落參邦國

苦秋暑引 并序

已酉歲廣漕邱迪嘉攝帥苛虐流毒朝廷劄
趙倉汝堅兼攝帥漕其人利忍不授印故作
是詩

商金久得柄老火未退舍甑中着寰宇赫酷甚於夏池
湯頗殃魚田龜應害稼桃李亦漿汗水國無涼榭扇揮
腕欲脫忍渴畏杯竿樹間寂秋聲矩令何時下四序本
循環寒暑相代謝炎炎推不去誰與詰造化人思濯清

冷風露願一借再拜祈蓐收西陸早命駕

七言古詩

觀入試者

鐘撼雞鳴萬家起月下紛紛白袍子提壺挈榼春遊鬧
擎箱擲篋誰家徙通衢隘塞行人絕露坐欠伸奴跛倚
遠聞雷譟轟應答近亦洶洶殊聒耳軋然棘戶破曉色
陣脚忽移去如蟻壯夫先入護几案儒雅雍容行且止
垂髻趨闕未知苦戴白相持歎衰矣自從明詔到郡國

士出深山集城市但能操筆不曳白秋榜人人都準擬
分明結社戰所兵投合主司誰得髓昨科試人今或亡
三年場屋能消幾功名信分置勿言身健頻來已堪喜
槐黃早脫吾僥倖因送兒曹得觀視傍人休笑李秀才
三十年前亦如此

再用觀入試韻

涵育累朝士興起薄海絃歌爭教子簞金世守章一經
俎豆少成孟三徙盡從科舉梯進取竊髮望深門日倚

藝先德後已非古心術乖違徒口耳天門髣髴馮為馬
陰德却關橋度蟻時來乳臭亦觀光潦倒英雄頻坎止
棘闈投卷姑應之桂籍題名先定矣可憐數千困眊耗
僅二十人誇利市近歲詞場尚剽拾文體腐陳難古擬
倩人者幸耘人貪氣習陋汙淪骨髓主司頭腦易冬烘
目色不迷世能幾所憂程文悞後學豈但升沉繫悲喜
他人愛子亦如我何敢庸心秦越視願言通榜皆實才
如已得之無彼此

送梁伯隆歸丹谷舊隱

秋堂之客自建上來省攜以偕行

昔人入山訪隱君每恨見山不見人予持畫圖走跋跋
人雖可即山非真自言谷中萬修筠泉鳴琮琤石嶙峋
誰甘混跡麋鹿群雅意遠遊濶見聞飛筇遂過南海瀕
翻海一洗征衣塵東望絕域天無垠藥洲風月蒲澗雲
間出奇語頗自珍奚囊十襲而三熏槿花猩血荔錦紋
何如故園桃李春江湖社友杯十分何如族聚情話親

行路之難多酸辛還家火急埋車輪拂拭磯苔開徑榛
畹蘭籬菊庭古椿贈篇滿篋不療貧幾人煉藥能輕身
本分荷鋤驅犢西疇耘武夷山下擊壤為堯民

羅浮何君祐夫相訪惠詩又出所作水墨魚戲

題卷末

山頭釣引千鈞魚鐵橋曾逢稚川奴風波平地誤點額
戲取墨汁翻模糊縱觀濠上契妙趣浩浩曾次涵江湖
墨雲忽從硯池起撥刺跳出形模殊大魚騰驤撼風雨

小魚瑣碎游荇蒲技如元放幾許奇金盤一箇松江鱸
試張亭前漲波影春鋤飛下傍睢盱世間畫史少活筆
描寫終類鮒肆枯文溪一灣浮釣徒欠得龍眠為嚴瀨
羊裘圖

三山亭

山中招提鼎足踞路如丁字分頭入遠看港汊紛長繩
俯見阜邱纔小笠班荆坐僕縱之息爭解綠荷撮紅粒
羣然飲澗忽喧噪石兀深叢疑虎立我起胡床劃孤嘯

前峯響答松風急舉頭雲端尚天半
撐竹扳蘿進千級

題石室木

似屈纔伸蛇解蟄似斷還連龍蛻骨
天河失却古槎檠
落在人間撐突兀若非胃中磊塊灑澆出老死盡工無
此筆

題東坡竹

葉葉枝枝各標致密密疎疎總風味
筆為化工壁為地
頃刻種成此君子雖然月影水影寫真似安得千年尚

生意

河南掃松訪古勝寺不遇主僧

主僧走城磨驢兒廊僧閉門縮頭龜長髮行者披鶉衣
淪我苦茗行相隨禪床破簾客自展急呼蒼頭揮大扇
臥到夕陽暑力軟歸趁潮平柁流轉



文溪集卷十三

欽定四庫全書

集部

文溪集卷十四至
二十

詳校官起居注主事臣顧宗泰

主事臣呂雲棟覆勘

覆校官中書臣宋 鎔

校對官中書臣蔣 寬

謄錄監生臣劉天綸

欽定四庫全書

文溪集卷十四

宋 李昉英 撰

五言律詩

送鄭雪屋歸里

征衣點落紅
君去與春同
貧到歸時見
吟多醉後工
不應冠尚鶻
自許氣如虹
急着看山眼
飛帆吸快風

送連推黃端簡赴班

端簡山谷之後其兄端亮余丙戌同年也

別我谷之盤今誰似二難西江詩種好南斗劍光寒千
里依蓮重三年食藥安頭班人品稱春意暖征鞍

武夷觀

開乘石罇船又到浙江邊回向初心地皈依古洞天成
丹呼鶴舞噴酒起龍眠雨意偏留客杯茶定宿緣

建倉解歸詩復徐意一二首

恨未澄清盡孤蹤已不安繆悠臣罪大感激上恩寬鄉
國三千里人心百八盤夢歸今始驗為我謝言官

其二

吏擎雙印出便覺此身輕物我忘恩怨漁樵寄姓名笛
聲黃犢背詩興白鷗盟故舊休相訝無書到帝城

題雪峯因大夢頂相

終朝咬菜根那得許精神自笑形為贅從渠畫不真閑
雲留片影活佛化千身大夢何時覺癡人問木人

贈始興順首座

江湖三十載敗笠破袈裟老面阿羅漢全身小釋迦定

無牛犯稼不見鳥銜花一笑西湖上相逢且喫茶

景泰寺

樹合疑山盡攀緣有路通遠鴉追夕照低鴈壓西風瀑
勢雷虛壑松聲浪半空凭欄僧指似漲霧是城中

挽鈍齋先生許象州三首

家學存齋授淵源自晦菴

存齋公伯祖也晦菴
為名齋且為之記

魁文行

海內師道重天南銜未冰條一州纔刀夢三芳名却千

載俎豆拜祠龕

其二

義重人誰及高風有古人已田分友子

友人林司法初筮西廣終於官

妻子貧先生割已田贍之

黎事保羈臣

顏瓊守羈廣西先生以經幹告身保薦顏起廢撫定黎峒

有功朝廷嘉之授瓊筦守

抱負耕莘志依稀陋巷仁丹青遺像在難

寫道心真

其三

丈席卽之溫終身佩一言棟樑失安定山斗慘韓門慟
矣心喪重淒然手澤存江聲助悲些莫返大夫魂

白雲山見五色雀

羅浮禽五色創見此山椒
錦羽嬉同墜鐵冠遷最喬
凝隨仙馭過喜趁白雲招
貴客非關我勞渠千里遙

送梁上舍必得大學解試

南國去天遠行程勿滯留
試期催負笈戰決勝焚舟
澹墨題金榜英聲起壁流
旦評期望久着力在毫頭

用前韻送潘上舍

謙為賢業址取履卜封留
筆下千鈞弩胸中萬斛舟
椿

庭聞誨語米廩友名流連捷歸藍綬鄰翁好話頭

挽如老歸真

不見纔三日喧傳已坐亡平生功行到垂絕偈言香緣分無高刹禪名却四方開包殘藁在切勿放毫光

送葉耆卿試太學

背城羸一戰壁水是儒林詞賦八义手功名寸鐵心程兼馳數驛學苦惜分陰清獻起庚戌長風送捷音

觀穫

負郭平田濶秋深穫課勤短鎌行缺月多稼剪黃雲舊
臘占三白今年稔十分太平村舍裏墮穗飽雞羣

山行

塵中事日生撥剔且山行襜被欣然出登車趣便清奴
收攜蠟屐客請帶棋枰纔過城闌外耳根無市聲

後峒月溪寺

寺巧蟠山背池圓印寺前連筒泉落甕如鏡地無磚若
苦苛留客僧淳懶說禪使君期不至一宿笑無緣

是日
期吳

守未
至

樵者

近道其樵者勞哉食束薪運斤碎盤錯荷擔下嶙峋恐
是仙王質何須貴買臣路傍迎一笑笑我糾簪紳

雲泉亭

白雲寺前新築此亭自為作銘

絕頂鬱其前寒崖噴玉泉亭成山補闕境勝我攬先樹
杪江天接榕根石磴懸賞心遂連日合為智仙傳

哭清遠權宰樓海司法二首

并序

樓君宰清遠峒寇一夕入縣治倉卒告變君
挺身出諭賊竟遇害歿於兵

諭賊散私財寘頑不可回憤然瞋目罵吾已戴頭來一
死當凶刃千家免劫灰遺孤元未有行路為悲哀

其二

百里稱廉吏誰歟起釁端州符需賦急軍餉及期難節
義扶澆俗朝廷贈大官邑人崇廟像猶似髮衝冠

送陳大雷試太學

裹糧數千里賈勇萬人場庾嶺琴書去橋門姓字香有
司應眼具喜氣已睂黃踐履宜天相時文況所長

悼花首湛長老二首

碧眸泓鐵面跣足衲懸鶉數日蒲團定一如泥塑人施
錢隨散擲忍辱已忘嗔丁字何曾識拈提話轉新

其二

別我笑吟吟羅浮願力深空拳餬衆口平地起叢林山
迥孤雲沒溪寒片月沉人今奇坐蛻在日孰知音

飲赴解試士友二首

座滿挺時髦經明亦富豪幾年勤用志三日健揮毫笑
取刀牛角相逢酒蟹螯有名還有分秋鶚碧雲高

其二

少日諳場屋斯文為細論艱深成札闥卑弱又西崑與
客為佳識當年是解元賀詩多辨取盛事屬於門

山寺夜起看月

丙夜忽窻白披衣起凭欄山川如畫見松檜照人寒孤

鶴欵屋脊群僧鼻紙單燈前呼老佛妙境許同觀

看僧披剃

爾教言無相誰教蛻髮毛虛名猶度牒多事更方袍父
認師傳的年推戒鵬高冠巾何不可只要斷塵勞

挽右史方鐵菴詩三首

一疏網常重端平起直聲難磨石宋璟不動鐵元城前
輩風流在南州箇信誠精神兼學力傾倒為遐氓

其二

喜怒皆和氣天全一片春眼高多識士心直不疑人稱
得深衣古爭傳判筆神恙微談笑去忽失玉璘珣

其三

紙錢森插竹遺像在方橋月暗甘棠密風嘶韓木喬所
悲緣瘁國於誼况同朝淒斷黃灣路丹旌些莫招

五言排律

觀定堂

梵宮凭水建蓬荻費芟除岸破群魚出枝危獨鶴居定

鍾僧睡早揮塵客談虛月滿龕燈小風停幡影疎供盤
多佛菓僧飯飽園蔬惟有開山老清高閉草廬

文溪集卷十四

欽定四庫全書

文溪集卷十五

宋 李昉英 撰

七言律詩 上

送高禮部不妄知嚴州

從來直氣勁摩空又吐忠嘉忤九重指斥分明人所忌
去留諄複上能容清風慨慕桐江釣異渥新疏竹使筒
熊軾一行聊復爾羽儀禁路要夔龍

別陳霆

并序

永福陳霆客鐵菴方公之館見謂清謹予送
公之喪至浴日亭下餞以小詩

政喜論文子遽歸扶胥之口訪韓碑吟篇佳處南游得
行李輕如始至時石友秉心終可托鐵翁具眼遠相期
勉旃辦取蘭闡捷四六供官且放遲

美廣帥趙平齋拓貢院

圍棘千間手拓開帥幢元是箇中來前峰卓卓尖如筆
正路堂堂穩踏槐自此鵠袍容萬士渾然龍化出倫魁

南州盡說明年好依舊科名得上台

癸丑菊坡
翁登科

送循倅黃必昌之官

好風佳月說龍川人喜新來別乘賢才儘優為千里式
學今有用四書全黃門祠下揮唫筆丞相嶺頭先着鞭
莫但俛睂銜紙尾忍教田里苦顛連

白雲登閣

白雲捧擁到危巔傑閣翬飛倚半天谷響頗疑吟木客
潮回坐見變桑田幾重山隔幾重海一日身閑一日僊

真樂無如會心處
林花野鳥亦欣然

雲關觀月

山間未晚先得月
料想城中見較遲
海吐銀蟾漸呈露
林垂翠影早參差
孤輪涵澗安禪處
明鏡當空沉籟時
夜半衰翁猶獨坐
清光吸盡入詩脾

登峽山疾風甚雨

長風吹裂碧雲堆
捲取銀河瀉下來
雨攪犀潭千尺浪
煙遮龍窟一聲雷
松翁偃蓋巖隈立
猿女穿蘿洞裏回

舊事蘭亭好拈出婆娑溪曲共流杯

峽山飛來殿

龍門鑿破碧天池呈佛高峯插翠微對岸鐘聲猶隱耳
御風簷角尚如翬二神擇地非著相雙錫騰空向上機
此境世間如更有安知古殿不重飛

峽山全清閣

無塵明鏡太玲瓏匣向周遭紫翠中地有仙家雲母石
天然上界水晶宮通宵如畫溪頭月盛夏回秋竹罽風

萬斛客愁都盪盡一杯聖酒盡欄東

同劉朔齋游白雲寺二首

衝暑登高人所憚雲韓龍孟樂相從眼窮溟海九萬里
身在蓬萊第一峯潮長嶼低帆勢急山迴路曲樹陰重
日斜移席臨池飲戲掬清泉解酒容

其二

勘破禪家最上關掀髯朗笑響千山海門正湧冰輪出
昏鼓先催玉節還獨上層巔風浩蕩歸沿小澗石孱顏

尋幽本是閑人事聊復分君半日閑

送張子元班見

笑掇巍科是管君等閑馬上換京官扶搖九萬從今易
植立千年自古難多辦衣裘禦風雪緊操維柁過瀧灘
中朝知舊如相問試把吟篇舉似看

和廣帥宋自牧勸駕韻

天將造榜放秋晴南國新逢運會亨障礙洞開來試者
計偕穩送上華京主人況是梅花宋寓客漸非日色程

面見河南已分曉
佇聆魁捷響仙城

西樵巖

巨石卷阿駕半天
樵山風景豈虛傳
水簾不捲四時雨
丹竈空凝萬古烟
印石尚存烏利跡
問誰曾識紫姑仙
我來遊遍登雲谷
更借山僧半榻眠

送都運陳煒以煩言去

鐵漢從來去就輕
當年烏府樹風聲
福星臨分人安樂
濁世如泥志潔清
祠命忽傳姦吏賀
歸裝絕少擔夫驚

退菴本愜家林興父老攀轅却有情

碧霄

未到白雲先碧霄瘦藤支我上山腰
煙橫遠樹醉眸豁竹引清泉塵慮澆
酒滴松根和露飲茶烹石鼎抱茅燒
平生不被利名鎖半掩柴扉聽晚樵

送李尉興龍之海豐任

書味無窮得屬厭待瓜六載不辭淹
乃心雅欲親諸老初筮惟知守一廉
毋縱彎弓獵雞犬謹防暴客起魚鹽

同鄉同姓鍾情處酌別中秋吸玉蟾

送舶使孫叔諧東歸

尊鱸高興趁新秋帆腹吞風湧去舟萬寶集登天子庫
諸蠻遮泣海山樓世間顛倒是非夢達者逍遙得失侯
歸到家林定重九團欒杯酒菊花浮

宴鳴珮亭和趙漕韻

數尺飛泉漏隔城寒巖坳處落琮琤懸知勝境無塵到
却訝晴天作雨聲一畝不容貪者飲兩峰宜着醉翁行

此泉千載因人重曾識光風霽月清

送三舉人

并序

已酉鄉貢鄰曲得三士甚為之喜玉帳鹿宴
有詩已即席和二首歸而別成一首贈三傑
之行

銅蟾滴硯不曾晴命到通時文乃亨善射定知楊破的
力耕必獲稼如京錦旗門巷誇聯薦椽筆春闈又中程
擢第三人如下問定將四字語元城

贛學鄉飲禮成二首

風化之原出泮芹飲循儀禮豆籩陳國中推擇爵齒德
堂上獻酌介僎賓主一敬存容自肅歌三樂備意相親
粲然應接非觀美所望今人樣古人

其二

無譁觀者也深衣古典如迂效頗奇放出曦輪行事日
飛來捷幟序賓時俎陽便覺春流暢拜爵潛教俗轉移
此禮重行應易易邦人耳目熟威儀

送子先賢歸南海

束書相伴到江西我尚濡留子遽歸輪角難生催別竿
刀頭欲折為斑衣功名有分須如意學問無窮更造微
若到家林遇奴輩先教拂拭釣魚磯

寄贈竹隱李聘君

圓沙有此隱君子短褐枯筇自一邱安樂窩中寬宇宙
逍遙游處眇公侯逢人皆喜一無忤於世何求百不憂
種德已深天必報大兒玉立最清修

翁長子春叟三薦
於鄉名士也清修

敬可

按通志聘君名用字叔大東莞人少孤侍母
雖盛暑未嘗去巾襪德器凝重造次必以規
矩初業科舉及讀周程諸書即棄之杜門潛
心理學者將三十年人稱竹隱先生公聞其
賢就見與語出語人曰吾今乃見有道君子
嘗著論語解究明伊洛奧旨以溯洙泗之源
學者傳習之公進其書於朝詔授校書郎不

受遷承務郎以旌其高安貧樂道無求於世
理宗御書竹隱精舍額賜之祠於邑學

同劉朔齋游蒲澗謁菊坡祠

曉隨絲轡飯僧坊丞相祠堂一瓣香試問神仙蒲九節
何如名德菊孤芳高山仰止堪模楷百世聞之尚激昂
我輩此來深有意豈專泉石癖膏肓

蒲澗滴水巖觀瀑

與可人游五四并快風吹面洗炎蒸鹿巡夾道千章木

猿掛垂崖百尺藤石室橫琴清振玉壺瓢酌水冷調冰
瀑簾雨後籠山濶不許塵埃俗耳聽

送鑒師住靈洲寺

少年芹泮也儒冠底事緇袍染異端孤島一燈開佛屋
長身七尺占僧單鐘鳴魚叩隨緣過棹舞鷗飛取次看
亭下聽經龜在否石欄搖影碧波寒

贈海珠湛老

也曾勘破到風幡坐得形枯鬢早斑衲子指為真鐵漢

江神幻出小金山華亭浪急翻船入葱嶺雲深挈履還
香燼未寒行道處蕭森翠竹護禪關

送廣東憲陳均二首

并序

邱漕陳知章抑平民為猺且就刀鋸陳公伸
其枉全活甚衆反為所誣遭劾而去

十五年間再繡衣幡然一出浩然歸園空但欲全人命
網打誰能避禍機壬巧交攻邪害正丁錢奏免是成非
離亭父老邁如堵莫駐春江去棹飛

其二

我如越雪致信信此事牽連亦到君久矣浮名等蠻觸
付之公論定猶薰四知誰不推楊震三已何曾損子文
甚欲一行陪祖帳萬山遙隔幾重雲

黃士奇泐檄送其雙親歸閩以詩送之

佳哉茂士頗圓機頻到蕭齋對麈揮官長見知因職業
人生最樂有庭闈東山至寶身當惜伯玉中年力去非
一事說來真可敬來裝罄矣貸金歸

贈曾士倬用許廣文韻

里閨如君苦績文幾年良玉困炎崑
鶚書快甚催隨計
鶴髮忻然慰倚門袍綠光華應分有汗青
久遠要名存
江頭目送西行棹驚起驪龍渴睡昏

送演姪三首

并序

演姪自建來省侍寧化尉闕到將之官作詩
警之

少年政要識艱難受國恩深早一官着力莫孤先世望

從頭細把四書看金蘭益友真同志菽水慈親曲盡懽
學取老夫窮意思免教人指袴繻純

其二

五常百行異其名腔子源頭一箇誠數馬似愚寧過謹
懸魚雖矮却真清寬和愛衆衆同愛驕倨輕人人所輕
詩好何如勲業好旂常元不載詩聲

其三

一同休戚尉相關肉食那容職曠瘼驗視難真防木刻

追擒易誤戒弓彎千尋樹看萌芽始萬里行從跬步間
大抵窮通皆定分災門邪徑莫躋攀

文溪集卷十五

欽定四庫全書

文溪集卷十六

宋 李昉英 撰

七言律詩 下

子先宗友試蘭省送以小詩

毫端五色織成章皎皎清標月照梁再戰文場推定霸
一經書法首尊王鞭揚庾嶺梅花早梯上寒宮桂籍香
師道自居吾豈敢所期竹帛遠流芳

北山證果寺

久聞北寺最清幽，因看花田遂一游。
近國好山半煙雨，參天喬木幾春秋。
香凝永晝添談柄，風送長松爽茗甌。
此境今纔逢我輩，不留詩去鶴猿羞。

羅浮國醮

并序

昔下元日朝廷遣使齋香建醮，有五雲呈瑞。
霓旆蹁跹，拜玉宸發，揮道德五千文，步虛夜半千山月。
朝斗空中，五色雲風雨若時昌，國運乾坤齊壽祝。
吾君賢侯方寸精誠積，散作豐湖叶氣薰。

羅浮飛雲頂

山行頗覺思悠然游遍仙家幾洞天
登見日亭風刮面立飛雲頂月齊肩
稚川翁有燒丹竈景泰師留卓錫泉
我得真人金石訣無求自可享長年

羅浮峒長寶谷王寧素送藥瓢

久矣深山煉鶴形聞呼峒長又逃名
斷崖怪木人稀跡亂石奔泉澗有聲
劒定通神收古匣棋聊供玩戲紋枰
藥瓢解贈寧無意重到狐菴論養生

贈雲峰演菴主

一菴移向白雲堆
檜栢參天少日栽
頗怪髮如金線樣
想曾眼見鐵橋來
佛粘土壁煎茶供
客對蒲團取芋煨
却笑老盧懷鉢走
只因說出鏡非臺

題羅浮冲虛觀化緣疏

仙去千年重此山
不禁風雨屋摧殘
金能點化空談易
錢欠通神着力難
支厦終非一木了
成裘未免衆毛攢
洞天有分人到輪
奘嵯峨起筆端

寶祐乙卯峒長黎
道靜住持冲虛觀

求詩化緣修

造輪奐一新

送湛師回羅浮花首山

翩然拂袖忽然回帶得羅浮面目來
乞食又還雙足重
坐禪豈是寸心灰
故依花首從三靖
旋摘茶芽供一杯
蘭若苦空君不厭
可能為我掃蒼苔

秋試已近用韻勉兒輩

鄴軸輪囷數世藏
乃翁曾讀被龍光
詩書有種芥拾紫
科舉催人槐落黃
學到自然名盛大
文工更要理深長

歲當酉戌吾家旺月府先教實桂香

送黃提幹赴班

不枉金閨貯一賢
唱名重見冕旒前
省闈見說第三賦
選調猶遲十八年
據實語人南嶠事
無多行李浙江船
壺山羣彥官今緊
直諒如今合茹連

送恩平潛使君還里二首

風流太守作春遊
到處恩波浩蕩流
懷綬故鄉需上日
移舟別浦趁中秋
聲歌洋溢行人口
書翰縱橫健筆頭

識面雖新心頗熟慙勤話別送歸舟

其二

五載南州屈重名活人一段是歸程
兩州曾喚兩蘇起孤節要師孤竹清
合有鋒車催赴闕不應畫戟又專城
閑身已決深山底千里猶能共月明

壽張新班

喜氣稜稜肖紫巖向來石燕毓奇男
九十

平聲音旬

入相今

纔半七日為人恰後三

正月十日生

籍濕金閨穹地步椒香

玉笋盞春酣赤松須待功名遂蒲澗清泉墨菊潭

送次兒解試

四度牋名達帝聰

國子監中者一臺諫及者三

布衣便有此遭逢吾

家積慶為心印一戰收功在筆鋒舉子頭場闢薦鶚時
文手段要屠龍庭前手植森森桂飛捷今秋好事重

紀事保林尉韻

并序

保昌尉陳知章權廣倅捕南海平民為獍賊
凡三十人獄將具余作劄子露香告於天而

後達於帥聞不行其言又以公狀達於憲臺
遠檄循倖潛君審之而後獄得少緩林尉汝
沆有詩用其韻云

清晨風日闢群陰一紙三熏上帝臨或者貪功頻滑手
毅然奮筆特誅心冤辭賴有由言折聖世難施漢法沉
此舉豈謀身禍福祇憐無罪繫南音

聞褫閣職免新任之報二首

遠民冤甚草菅芟抗論公庭出至誠且喜一方全性命

何妨三字減頭銜機關平地藏深窞仕宦伶人視戲衫
五遜州符今免矣幅巾藜杖可松杉

其二

狂妄孤臣罪有餘三年三度掛丹書群兒過計愁郎罷
外物浮名總子虛只是儒酸真面目不題道號混樵漁
親朋欲語澆教醉休與時人定毀譽

送族子春叟游西廣

鳳出丹山定九苞桂林要揀一枝巢久聞巖竇須幽討

不是豪人莫汎交
鶴髮頻將安問寄
螢牕勤把舊書抄
功名到底還堅志
崛起新豐一草茅

後峒月溪寺

森森杉檜鬱相繆
散策何妨逐勝游
梵宇莊嚴傳浙樣
碧池蕩漾納泉流
將軍贏得山林在
衲子多因粥飯留
眼界雖云欠軒豁
晚涼宜酒且夷猶

送荃翁張端義之惠陽

并序

張荃翁太湖人
端平雷變上疏直言
謫居曲

江往來韶廣間後又以言忤當路者謫化州
終焉

吹面東風豎綠簑詩翁七十醉婆娑放懷自號天隨子
知我無如春夢婆吟有小奚磨破硯臥看赤脚踏行窩
太湖爭似黃灣濶高浪粘天獨笑過

即席和人韻送荃翁

詩似油翁背注油知音世有幾荊州乍寒乍暖方榆火
無米無錢只葉舟客況可堪今老大人何必盡封侯

津亭且莫匆匆去萬斛春醪任拍浮

送李路鈴萬入京

有序

路鈴李萬建安人邱漕以梅州辟之不受

運厄南州暴吏專鵬冠却有好官員捕獠怕損平人命
製錦盡除常例錢枘鑿一言辭辟郡胷襟三略合籌邊
景文匹馬長相過我愧才非玉局仙

和心字韻送林尉公琰校文

鵠袍忙立老槐陰爭望文星早照臨稱物衡無高下手

別形鑑有是非心品題豈逐朱衣轉沙汰何妨苦海沉
將見賢書協輿論眞才到此遇知音

蒲澗和東坡韻

四時冰柱濕風前絕頂飛來一派泉瘦蔓相牽根太古
蒼崖特立探長天竈荒孤鶴尋遺跡寺老幽禽闔坐禪
閑日頻游歸復夢結廬曾許躡坡僊

蒲澗山行宿景泰呈諸友人

蒲根採得汎金船滴水巖前且地僊造物添支閑歲月

上恩不與好山川意行芳草迷丹竈旋摘新芽撥澗泉
欲雨還晴便登覽更消一宿白雲巔

四月十五游僧寺

今日快逢僧結夏不妨乘興扣禪扉山垂遠瀑溪聲急
風捲痴雲雨脚稀囊錦詩成僧借看紋楸棋落鳥驚飛
此來莫訝凭欄久傑閣新成拂翠微

代送邱漕迪嘉

假帥如公自古無邦人久矣望鋒車政聲難掩諸公說

明主周知萬里餘
豹尾雞翹那欠此
尊羹鱸膾且歸歟
江頭鼓動江船去
喜氣歡聲動里閭

用人韻送梅糾梁現

征鞍風軟踏香塵
又送斯人南海濱
糾郡正資賓畫重
洗冤須放筆頭春
勉期聖處功夫到
肯學世間兒女輩
五瘴由心今一洗
笑渠辟瘴嚼人頻

送船使周申

堂堂山立舊朝簪
久屈清流督獻琛
風趕連艘出獅國

浪吹殘句到雞林平生不隔同年面中歲難禁惜別心
歸見耆英定相問只言閉戶萬山深

贈宋省元魏薦經義

宋秉孫廣帥慈之子也治周禮義

傑作傳來見一班少年筆力老孱顏根源有學皆堪味
首尾無瑕孰敢刪工要前篇人易取說須兩段意相關
森森天骨晶光縹去必軒騰十二閑

八月驟寒

秋欲中分暑更裨金風崛起便成寒桃笙夜展猶嫌執
狐向朝披便怯單翻手炎涼真可笑循環造化果無端
老來一任添霜縷寒暑難磨只寸丹

中秋無月

已孤前度一中秋滿望今宵月下游藥杵放閑靈兔懶
鏡奩掩却素娥愁知誰有術擎梯取枉費當年弄斧修
天靳清明每如此樽前休恨翳雲浮

示兒用許廣文韻

斐然狂簡不知非
席帽何時免
誚譏官樣詞章
惟典雅
心腔理義要深幾
各隨鵬鷃高低適
一笑雞蟲得失微
偶未成名兒勿恨
我方追悔蹈文闡

鑒空閣

鑒空閣上賞僧軒
祇樹深開不二門
一水橫流界平野
數峯突起補前村
舟來舟去人多事
潮落潮生岸有痕
鎮日長閒輸老衲
倚筇獨坐古榕根

文溪集卷十六

欽定四庫全書

文溪集卷十七

宋 李昉英 撰

七言絕句

建寧解歸寄雪峰因大夢

行脚今朝又起單
欣然歸去得安閑
從前大夢難忘處
上白雲山望雪山

弋陽鄭氏翠麓亭

管領寒溪揖怪峰
徑穿鉅竹綠陰濃
幽人去後無猿鶴

冷落亭臺濕蘚封

羅浮梁彌僊游爛柯山贈以曲筇方笠

葛坡龍竹東坡笠合伴山人到洞天
柯爛想應留斧在憑君試問石橋仙

過嚴子陵釣臺

船重祇因將利去船輕又恐為名來
如今羞見先生面夜半撐船過釣臺

勸梁青霞歸羅浮舊隱

逍遙八極片雲浮所過名山不久留依舊片雲歸石峒
從今休更下山游

南華寺五首

誦經聽得入從門壁上偷他四偈言畢竟單傳端的處
賣薪供母是心源

其二

西方骨董南方寶留鎮曹溪幾百年自是後人當不得
有如翁者亦單傳

其三

從前梵說墮虛空獨有壇經說不同體用圓明皆寶相
一丁不識却心通

其四

未叅五祖已開山合下全身此地安不是香煙忘故里
衣留孔道要人看

其五

清者何曾飲盜泉僧孟底飯逆巢田此疑欲問師無語

風撼長松嘯半天

雨行梅關二首

濃風四合凍雲凝水墨連屏鬪崛奇衝雨此行風景別
滿山翠滴水簾垂

其二

通宵雨滴急催梅枝北枝南曉盡開多謝花神好看客
隨車十里雪香來

雪封寺二首

鑿通危石張文獻
勘破禪關盧祖師
奇事已堪誇北客
梅花先暖亦南枝

其二

征輿六月度梅關
大地清涼樹影斑
行客不須梅止渴
流泉到耳冷潺潺

峽山詩

并序

壬午仲冬逾至三日羊城進士李鼎英西遊
抵峽山舟距寺而維焉是夕也風壯浪號毆

聲戰激蛟騰龜湧與舟盪摩垂丙而不寧枕
翌日既望攝衣登寺覩其靈跡森然昭布不
我誣也嗟乎是胡為而來哉境奇物勝千態
萬狀神愛而茲來則士之假道乎是者亦必
不凡矣行將掬山之青歆水之綠與山水俱
甲天下以實地靈人傑云於是乎書

山通一水逕皇都多少英豪出此途傳我飛來元羽翼
好風吹送過天衢

靈洲

眼前無限往來舟
射利干名不肯休
少見人心如此寺
屹然砥柱在中流

池州溪橋

萬里長江吸一盃
等閑袖劍九華來
溪橋獨坐無人識
又駕長風跨鶴回

迎廣帥徐意一大叅五首

桂林舊着繡衣來
久矣餘波拍越臺
自古直臣多牧廣

廣平曾賦嶺頭梅

其二

曉來竹馬躍兒曹次第牙幢壓近郊
五老跨羊持色穗也應歡喜候前茅

其三

別去丹山劃七春一廬今日是滕民
擬撐釣舸迎前路猿鶴從傍冷笑人

其四

魚稻之鄉鴈鷺驕鯨鯢噴沫撼江潮
明公自是威風手
南土應無莠害留

其五

杜劉二子潁川居出處雖同語嘿殊
勿謂寒蟬吾願學
閉門自辦靜工夫

送魁星與李子先

金斗高跳鬼狀獍世傳此像是魁星
祥光閃爍開先兆
助子秋闈筆硯靈

司法曾子美新第榮歸欲得余詩不敢效世俗
諛語二首

里同清獻久聞風耿耿胸中便不同一疏叫雲韋布日
大廷對策想輸忠

其二

舌似河懸筆水翻春官首疏見忠肝士須卓爾名當世
好取前修節行看

表釋應端住興化寺以其說而勉之二首

鉢中滴水也難消切莫貪他寺富饒留取大皮纏大樹
腹圍緊緊篋三條

其二

一般奇怪弄精魂猪蜆皆餐針戲吞未到空通渠地位
只當齋戒作沙門

白雲獅子峰望羅浮

白雲乃羅浮西麓

不到羅浮瞥六年後期幾誤鐵橋仙遠雲不隔山真面

西麓原同第七天

羅浮桃源洞

在山東北其峒幽邃人跡罕至

靈符鎖盡穴中蛇深入千巖處士家峒戶隔雲呼不應
時時流水出桃花

戲題羅浮梁彌仙寫真

八十童顏雙眼明浪游湖海一身輕莫將啖肉先生比
箇是羅浮老樹精

和徐意一韻贈寶積中空山

道是空山却有渠原來有有亦無無若能空到真空處
萬斛塵埃着碓夫

採陽軒

看盡西園十里梅黃昏寒月趁人回要圓一段清游事
更訪仙宮索茗杯

古成之仙箕

翁來靈筆舞龍蛇翁去瑤壇鎖暮霞舊事欲談三百載

五雲閣上望仙槎

書龍頭義約簿二首

人鵠一千

桂菊風香造榜天門標捷幟地流錢筆端快便行年順
騎鶴纏腰身兩全

其二

鵬鶚聯翻二十名看看金榜是同盟河南人面分明見
盡說龍頭識已成

重九日游南山峽覺海寺

恰重陽日到南山小摘黃花供綠樽鐘叩一聲蕭寺晚
移舟載月過前灣

夜夢漁父求詩覺能記其全書贈梁彌仙

酒湖無盡春無限一葉江湖萬里天明月滿篷風荻響
醉眠正在白鷗邊

衆建蓮社堂求疏語

遠公鼻孔着蓮香引得喃喃闕幾場供佛建菴人更錯
參機元不在西方

贊銘

淨慈釋刺血寫經贊

浮屠覺新在淨慈針血書楞嚴圓覺法華華嚴經兩年
而後成錢塘劉植捐金植藏而甌之文溪居士李某為
一轉語

此經如筏寫之着相而刺血寫妄中之妄經諸佛說血
父母生何淨何垢等為前塵末法閻黎沉酣入骨一毫
且靳而況於血血猶可舍是知身幻大痛一回直須臂

斷

三十五代張天師贊

冷面皎霜凝電光雙目崢生來元自別不但父書靈

鍾離仙贊

衣兮木葉髯戟面鐵所執何書願聞其說

呂洞賓贊

碧其風巾皓其雲袍六合飛遨仙中之豪

維摩贊

丈室着不得文殊衆香國裏薰教臭無端詐病却成喑
只為從前多業口

舊書頭批云文溪真跡丈室
作室中裏作上多業作業多

自贊

鈴嶠山癰搭颯野服煮茗松根煨芋巖曲且農且漁非
仙非俗淇傍何有秋鶴霜竹

廣州天慶觀衆妙堂東坡井泉銘

方石史取定林寺鍊井欄護之

老經云坡記成名非古堂遂輕兩翁像久晦冥偉方公

舊貫仍取彼欄護此泓新作蓋環以銘遺千年飲清冷
續坡誰李鼎英

行者了寬等題錢買度牒疏四章

已辦僧心未圓僧相纔得方兄便成和尚

其二

作佛何曾要裹纏頂門尚欠世間錢舍身者與舍佛者
選佛場中化有緣

其三

作佛本無相為僧却要錢豈無人割捨為結惡因緣

其四

即心是佛見性成僧無奈世緣要二尺綾

文溪集卷十七

欽定四庫全書

文溪集卷十八

宋 李昉英 撰

詩餘

蘭陵王

燕穿幕春在深深院落單衣試龍沫旋薰又怕東風曉
寒薄別來情緒惡瘦得腰圍柳弱清明近正似海棠怯
雨芳踪任飄泊 釵留去年約恨易老嬌鶯多誤靈鵲
碧雲杳渺天涯各望不斷芳草更迷香絮回文強寫字

屢錯淚欲注還閣
孤酌住春脚便彩局誰收寶軫慵
學堦除拾取飛花嚼
是多少春恨等閑吞却闌干猛拍
歎命薄悔舊諾

摸魚兒

曉風癡繡簾低舞
霏霏香碎紅雨燕忙鶯懶春無賴
懶為好花遮護
渾不顧費多少工夫做得芳菲聚
休顰百五却自恨新年游疎醉少
光景恁虛度
猊壺瘦困起庭陰正午游絲飛絮
無據千林濕翠須臾遍難綠鬢根

霜縷愁絕處怎忍聽聲聲杜宇深深樹東君寄語道去也還來後期長在紫陌歲相遇

摸魚兒

用古買陂塘旋栽楊柳韻

敞茅堂茂林環翠苔磯低蘸烟浦青簑混入漁家杜斜日斷橋船聚真樂處坐芳草瓦樽滿酒頻頻注臯禽自舞慣松逕穿雲梅村踏雪朗笑自來去車乘墜爭似修筇穩步前塵回首俱誤安閑得在中年好抱甕尚堪

疏圃高眼觀算不識人間寵辱除巢許風簞解語應共
笑羣狙無端喜怒三四計朝暮

摸魚兒

五羊郡圃築壯猷堂落成

遶西園粉籠干雉鏡池屏石天造主人意匠工收拾華
屋落成聞早輪奐巧望縹緲五雲深處移蓬島油幢羽
葆指貔虎長驅鯨鯢網取電走捷旗報 鏡吹發回廡
連屯飲犒海山波靜煙掃綸巾蕭散環珠履春滿綠楊

芳草人境好是握穗五翁福地無塵到芝書在道便整
頓乾坤經營萬宇棟國要元老

摸魚兒

送王子文知太平州

怪朝來片紅初瘦半分春事風雨丹山碧水含離恨有
脚陽春難駐芳草渡似叫住東君滿樹黃鸝語無端杜
宇報采石磯頭驚濤屋大寒色要春護陽關唱盡鷓
鴒徘徊東渚相逢知又何處摩娑老劒雄心在對酒細評

今古君去此幾萬里東南隻手擎天柱長生壽母更穩
步安輿三槐堂上好看綵衣舞

賀新郎

陪廣帥方右史登越臺

繡谷流明幟穩飛輿茵菜草碧蓋欹松翠遨首意行窮
絕頂綵榭千年勝地遠峰斷莽蒼烟水護日晴雲收午
暑颯長風振葉生秋思籠霧炷影霞袂 清明官府歌
棠芾且蕭閑事外下看玉城珠市山色驕人逢此客塵

尾霏霏露碎一笑五羊銜新穗田野歡聲和氣合喚觥
船猛為魚占喜誰曾得醉翁意

賀新郎

餞廣帥馬方山赴召

世美官高大又誰知幾多卿相身榮名壞我輩相逢無
愧色彼此蒼顏健在又容易分携越海寫出陽關離別
恨看一行鴈字斜飛界天下寶願自愛白衣蒼狗須
臾改久冥心雞蟲得失鷄鵬遲快君帶貂蟬頭上立老

我荷衣草帶肯此膝向人雅拜遠餞元非趨炎者二十年相與形骸外義金石更堅耐

賀新郎

同年顧君景冲

雲翼

經屬官舍白蓮盛開招

飲水亭

誰種藍田玉碧雲深深亭亭月上水明溪曲羞作時妝兒
女態冷淡冰餐露沐出塵外風標幽獨除了留侯無此
貌便何郎傅粉終羸俗意凝遠韻清淑 涼臺向晚微

風馥訝銀杯羽化折取戲浮醺醪安得梅花如許大天
遣辟除暑溽渾不覺鷺翹鷗浴可恨妖妃汙太液只東
林社友追遊熟宜夜看燦瑤燭

賀新郎

賦菊

細與黃花說是天教開遇重陽玉裁金屑老行要尋松
竹伴雅愛山翁鬢雪任滿插追陪節物惟有淵明吾臭
味傍東籬盤薄芳叢擷便無酒也清絕 芒寒色正孤

標潔慣平生餐霜飲露倚風迎月不比芙蓉偏嫵媚不
比茱萸太烈似隱者瀟閑巖穴至老枝頭猶健在笑紛
紛紅紫塵沙汨香耐久看晚節

賀新郎

餞廣東吳憲燧

時持節憲江西

元日除書濕到而今西風老矣駕軺初入自是龍顏深
注想孤鳳翔而後集久父老攀留原隰庾嶺經行梅亦
喜小奚奴背底惟詩笈冰雪操又誰及 昨來容易風

雲翕便三台兩地也只等閑如拾天馬不鳴凡馬喑百
步何如五十況洶洶波濤方急此去一言回天力着着
高百尺竿頭立澆磊砢快鯨吸

賀新郎

再用韻餞吳憲

過雨璇空濕皓秋香光浮桂菊曉風吹入柳繫牙檣應
小駐草草還成勝集又追趁牡車原隰照座玉人風骨
聳想曾蟠藥闕琳瑯笈眞作者世難及遠山雲霧工

開翕共朱闌徙倚總好錦囊收拾老我祇今才思澁知
二爭如知十憂金縷檀敲休急訪古夷猶行短境憶朝
陽鳴鳳臺端立筆也醉硯池吸

賀新郎

丙辰自壽游景泰小隱作

天地中間大縱遨遊登山臨水散人一箇學易已來秋
又六肯趁名韉利鎖得日日安閑笑過金馬玉堂也曾
到儘不妨拍手溪頭坐風弱笠月蘭舸今朝記是初

生我近小春黃菊猶葩早梅將朶拔宅危巔窮勝踐指
點塵寰蟻磨看澗底飛泉珠顆松栢蒼蒼俱壽相更千
年雪鶴鳴相和安期老舉盃賀

水龍吟

癸丑江西持憲自壽

唱荅初意如何竭來五十二年矣犁鋤頗熟詩書麤解
簪紳聊耳自信柴愚真成汲戇却無劉膩向高秋初度
同時有菊淡相對風霜裏最癖登山臨水又何心蝸

名蠅利俗緣未了強教肉食何曾知味無事微吟會心
微笑逢場微醉把日生只恁安排領取百十二歲

水龍吟

和吳憲韻且堅鬱孤同遊之約

驛飛穩駕高秋迎人滿目清新景秋還有色芙蓉照水
晨妝對鏡雪捲寒蘆字橫過鴈渡浮孤艇是騷人行處
腔風調月香滿袖過梅嶺斷岸烟收人靜雨聲乾桐
疎楓冷掀髯獨笑仙翁起舞臥龍呼醒近小陽春為梅

也合遲遲鞭影更鬱孤一笑追歡料得坡翁首肯

水龍吟

觀競渡

碧潭新漲浮花柳陰稠綠波痕膩一聲雷鼓半空雪浪
雙龍驚起氣壓鯨鯢怒掀鱗鬣劈開烟水算戰爭蠻觸
雌雄漢楚總皆一場如此點額許教借一得頭籌歡
呼震地翻嗤浮世要津撓進奔波逐利鬪了還休倩渠
銜寄三閭角黍會風雲快出為霖可但領明珠睡

文溪集卷十八

欽定四庫全書

文溪集卷十九

宋 李昉英 撰

詩餘

水調歌頭

題舫齋

郭外足幽勝潮入漲溪流舫齋小小一葉老子日遨遊
管領白蘋紅蓼披戴綠蓑青蒻直釣任沉浮玉縷飽鱸
膾雪陣狎沙鷗箇中眠箇中坐箇中謳箇中收拾詩

料觴客箇中留休羨乘槎博望且聽洞簫赤壁樂處是
瀛洲日月盪雙槳天地一虛舟

水調歌頭

題斗南樓和劉朔齋韻

萬頃黃灣口千仞白雲頭一亭收拾便覺炎海豁清秋
潮候朝昏來去山色雨晴濃淡天末送雙眸絕域遠烟
外高浪舞連艘風景別勝滕閣壓黃樓胡床老子醉
揮珠玉落南州穩駕大鵬八極叱起仙羊五石飛珮過

丹邱一笑人間世機動早驚鷗

水調歌頭

壽叅政徐意一

地位到公輔耆艾過稀年幾人兼此二美而况是名賢
松栢蒼然長健薑桂老來愈辣勁氣九秋天鯁鯁嬰鱗
語不改鐵心堅說武夷同此月瑞三仙公雖居後環
奇偉特却光前續得紫陽脉絡了却西山事業舟楫濟
商川飲對黃花榭一酌歲三年

水調歌頭

題登春臺

野趣在城市崛起此臺高誰侈蓬島馮夷夜半策靈鰲
十萬人家甃碧四面峯巒湧翠遠峙拍銀濤插漢筆雙
塔簸兩葉輕舠我乘風時一到共嬉遨江山無復偃
蹇彈壓有詩豪寶劍孤橫星動鐵笛一聲雲裂寒月水
宮袍滄海一杯酒世界眇鴻毛

念奴嬌

壽王守母

瑤池高會見雲香鳳背風柔鶴膝天遣月卿來拜舞新
拜璽書增秩有母能賢生兒如此總是前身佛孫曾戲
綵慈顏一笑閒逸曾向渾尺軒中共評今古手寫王
言綺箇裏迺翁棠蔭在映得梅仙山碧人愛黃堂祝萱
堂壽拍拍歡聲溢明年宣勸蟠桃大棗庭實

念奴嬌

寶祐丁巳閏四月偕十友避暑白雲寺

麥秋時候薄陰罩炎日山行乘興筇屐追隨多勝侶青
珮黃冠方領坐石談玄聽泉濯暑直上千山頂倚風長
嘯籟鳴林谷相應忽湧雲氣漫空海吹急雨覺冰練
微冷洗盡人間名利障便是蓬萊仙境半日偷閑一生
清福豈在縈鐘鼎青燈深夜陶然獨妙清聖

瑞鶴仙

甲辰燈夕

玉城春不夜映月壁寒流燭蕖光射鰲山海雲駕擁遨

頭簫鼓錦旗紅亞東風近也趁樂歲良辰多暇想陽和
早遍南州暖得柳嬌桃冶堪畫紗籠夾道露重花珠
塵吹蘭麝歌朋舞社玉梅轉鬧蛾要且重占先探蔗郎
戲巧又卜紫姑燈下聽歡聲猶自未歸鉗車寶馬

沁園春

監司元宵招飲不赴

纔到中年節物渾閑賞心頓輕據隨分東風瓶簪柳雪
應時燈夜棚綴蓮星自一家春也三杯酒巧重堆香笑

語聲又何須聽那西樓絃管南陌簫笙 平生黃卷青
燈肯珠翠奢華八尺檠欲趁隊閑嬉雕鞍寶馬回頭猛
憶破案囊螢鄰曲漁歌庭除鶴舞塵外冰輪徹骨清人
閑處這炯方寸一點長明

滿江紅

江西持憲節登高作

薄冷催霜碧空豁飛鴻斜度重九日御風絕頂下看塵
宇滕閣芳筵牋筆妙龍山勝餞旌旗駐料山靈也要可

人遊成佳趣 吹帽墮羞千古題字非吾侶却坐間着
得煮茶桑苧萬里寒雲迷北斗望遠峰夕照頻西顧且
滿浮太白送黃花劍休舞

滿江紅

和劉朔漢節亭韻

人似梅花峭玉立歲寒風節新圃闢種梅千樹幻成南
雪池碎瀑聲荷捧雨徑涵秋影篴節月喚石君錯落坐
庭前紅塵絕 嫌刮耳秦箏第憂慵着眼俳優狎但一觴

一詠放懷開濶湧地池亭工掩映擎天柱石覘施設待
枝頭金顆可調羹休輕折

菩薩蠻

別劉朔齋後寄詞時朔齋抵峽山拾遺詞至
雲山疊疊雙眸短夢魂夜趁行人遠千里共襟期吟風
飲月時 碧溪穿翠峽雪意蓬蕭颯安得翅飛來衝寒
同訪梅

漁家傲

重着夾羅猶怯冷隔簾拜祝團圓鏡取片龍涎安古鼎
香閣靜橫窓寫出梅花影寒鵲鷓枝飛不定回紋刺
就更籌永小玉欣眠呼不醒霜氣緊麗譙吹動梅花引

西江月

小鷁載池心月長虹跨水中天主人情重客留連便欲
乘風寒殿霜竹且傳秋信鏡藻不作春妍夜涼正好
倒金船朔飲而今再見

浣溪沙

筍玉纖纖拍扇紈戲拈荷葉起文鴛水亭初試小龍團
拜月深深頻祝願花枝低壓髻雲偏倩人解夢語喧
喧

城頭月

和廣帥馬方山韻贈斗南樓道士青霞梁彌
僊

工夫作用中宵晝點化無中有真氣長存童顏不改底
用呵摩皺 一身二五之精媾積得嬰兒就試問霞翁

三田熟未還解飛冲否

文溪集卷十九

欽定四庫全書

文溪集卷二十

宋 李昉英 撰

家書

丙戌科過省第一捷書

三月十八日捷字到
廣州二十日到石灘

某頓首百拜上覆大人朝議亞媽孺人某茲者荷先祖
餘慶大人陰隲省試叨冒第三名自顧識淺才疎何足
當此今因捷走報謹寫數字以實其信然鄉間前此無
報三名前之例必有無厭之求亦宜權其輕重多不過

為政首可也恐州縣有禮議大人可謀之親知諳識者
隨時區處即此報知他冀精衛寢食以迓鴻祉某此來
合受推官文林郎出身乃廟堂送闕亦候在外待榜者
畢至方始唱名賜袍笏聖上御便殿以頒之仍舊例入
局待注受畢日七月初必有歸期謹此拜覆伏乞尊覽
某百拜上覆某煩一哥覆知大人門徑只宜依舊不必
加粉飾遇某舊亦煩一哥呼名致謝

第二家書

某頓首百拜上覆大人朝議媽媽恭人即辰季春恭惟
尊候動止萬福某茲者叨冒正奏第三無非大人平日
積德之驗但開榜之後百費叢集租一屋在學前庶得
王魁張魁亦在左側某所賃之屋一月二十券捷人與
諸人來賀亦五十券受劄之始凡百物件皆是新置如
買轎皂衫袍帶幘頭朝靴一身衣服轎番四名每月二
十餘千書司廳子二名每月亦十五千已至借僕一日
十餘人况某不諳此間新第事體只得挈張上舍德明

事與之商推庶得適宜日間供膳皆是已出出二元信費二十千未用一百餘券自惟窘乏不能措只得轉假之鄉人候回日償之有便可報陳宅必有錢助費但非親實人不容付之來也書鋪來呈丙辰科事例到五月中方唱名入局以至受闕并其他禮儀亦七月初方畢到冬方有拜侍之期所喜二狀元相處甚得有事必日來相報出入皆同行大魁台州人三十四歲榜眼亦台州人六十餘矣凡見主司及朝士皆與之同及見鄒尚

書彼再三丁寧未要相見諸朝士某自此不出諸同年
及鄉曲相識官員日間相見常一二十人只得奔走報
謁不容已也某茲者本經出王太傅定房叅詳丁郎中
黼知舉鄒尚書應龍論在林太博良顯策未知在誰房
三場未經改削未敢附去恐有人問但以試官所批示
之某此回例受推官已令人尋訪江西廣西諸處自揣
疎於吏事亦須一年以上可也亦但言其緊已至兩處
店主人書鋪亦須百以上千請兩人作四六亦須百千

事體大槩始末非千券不可鄉間風俗薄惡多言某受人繫着不可信某新得一第尚要前程久遠

第三書

某伏以春律向盈韶光未減恭惟大人朝奉亞媽孺人尊候動止萬福某自得捷當夜即發家書與捷子又附一運司走文字人想皆到矣然潮州陳子諒必爭先但以家書為實犒捷之資必候潮廣兩處人俱齊方始酌其輕重不可作兩項支與某嘗會張魁渠云鄉曲捷人

必待八九月自歸方始結付乃其鄉例也恐未有錢推
以待某歸尤佳小人無厭驟多與之彼必求索無已更
在斟酌輕重合數報人共二百上下可也某自歸榜後
終日奔走及歸安下處則諸公來訪及同年諸友相見
求入局者甚衆應酬無暇來見鄒先生丁寧勿出某恪
守此戒然程中書陳中書皆遣人來請見不容不往以
至某文字出渠房者皆往一見之然諸公以某遠方人
忽在前列皆有願見之意凡所造見甚荷溫接相見必

問堂上及聞某具慶則歆羨不已又問大人之年某乙未對尤加羨焉其問娶否則以已綴親對書鋪呈甲辰例唱名在五月十二緣其年混補別來試所未開今歲既無混補必須待出局及注差了畢必七月終方有歸期前日局中合千人來叅書吏廳子虞候上名事官每位三四十某不敢留使且待入局京城桂玉之地日費不貲王魁綴其同舍寧國府杜丈之女岳翁為之支遣張魁乃宰執侍從撰述文字人故諸公送饋良厚惟某

乏素其接待禮數出入儀從只得勉強隨之鄉間義約
錢一百券帶來四小鋌梁幹又借去一笏雖鬻之笏猶
有窘乏之憂不免就施丈假借渠又要歸還七百足更
與渠商榷如何勢亦只得就渠借也家亦不必附錢與
之但龍涎香可買數兩素馨湯茶餅之類可買二三十
瓶作人事戚家蘇合香丸感應丸亦買數兩來更白拂
手數條云云

第四書

某百拜上覆即辰清和在候恭惟大人朝奉亞媽宜人
尊候起居萬福某伏自塵忝之後三附問安之書想已
俱到後遇鄉間補試諸丈詢及家間動靜三月廿八日
某人抵京復接家書深用慰浣某自箭橋移居學前非
報謁官員不敢輕出凡事不敢輕舉張德明以私試回
齋適惠州朱新恩篆至某遂校之同樓復留一房以待
倫耀卿而四月初彼猶未至也日來諸廳賀吏已撥剔
稍定惟是同年之求入局者多挾朝貴或托相知頗為

所撓只得隨輕重區處至於潮惠南雄諸同年既是一
路不容不存之也唱名亦未有日子想只在五月初間
矣所費浩繁已就施丈借五百券家間亦不必寄錢來
用若有所爭不多不必與較若大段相遠某做一道理
此不足慮某前者已修劄達之陳宅不知彼曾來相賀
否朱新恩篆文雅且賢與之相處甚得彼遂有續絃之
意大人便問發與令往說之朱丈乙巳生可與為親邱
丈亦知其五行若消耗之便中垂示有一劄達之廣平

公少叙謝意人旋甚亟漕臺倉舶書未發尚需別進未由省侍伏乞倍加調護以介鼎來之祉某下情祈祝之至某百拜上覆大人朝奉亞媽宜人六叔朝奉

第五書

某頓首百拜上覆即辰炎伏在候暑氣方殷恭惟大人朝請亞媽安人尊候起居萬福某偕璧英在此如常母在留意念六月初二日陳全付至家書與陳宅書信皆到官券五百貫已如數得訖十三日上御文德殿移御

榻臨軒引見前三甲人三名前作一班相去纔咫尺日
表龍姿儼然在前餘四甲五甲人只在殿門之外不及
見也禮畢三名前就幕次各賜食七品羅滿几案精美
可挹累科所無也中貴快行衛士來索謝恩詩即時就
換袍笏是時駕已入內但抱勅黃拜殿門而已三名先
謝而出即重戴乘馬所喝迎導如每科儀但未過太廟
不審其儀也

附菊坡回劄

某惟時初夏氣清而和伏惟新恩朝議鄉兄稽古
策勛有物作助台候動止萬福某屬厭德聲久其
日矣自西戍南歸謂有一見之便而抱病簡出披
睹猶未見快茲聆擢雋南宮歸乎充選亶為盛事
用壯老懷枌梓亦為之改色顧如天才甚穎月評
所推文章有經世之宏模撫義得尊王之大體再
鼓而氣益壯一呼而人皆驚因思士以得時而為
難名者造物之所惜山川清淑之氣蘊蓄幾百年

鍾此間出之奇況年不可及自守甚堅即其中之
所存自此而充之遠到豈易量似聞春風得意之
初聲容光不露盛名之下謙以將之夫所養益厚
則所受必大區區贊美正為是也某以疾丐閑幸
得請屈伏牖下餘息厭厭忽聞捷音不知宿疴方
圖致慶乃為故人所先三復不勝慰滿錦還諒在
秋中初筮不必擇官擇地榮進素定茲為發軔指
快僊刊此見意膚帥不逮所施而情則真矣尚希

孚炤右謹具呈四月日

煥章閣直學士中奉大夫提舉崇福宮崔某劄

文溪集卷二十

欽定四庫全書

文溪集卷末

附錄

郡城忠簡祖祠堂記

孫際明撰

宋咸淳九年紳士請於郡祀先公與菊坡崔先生合祠
元人因之明興敦勵名教崇尚德賢祀事益謹嘉靖十
五年丙申闔郡舉人倫諫梁津李鸞曾貫周懋德黎民
表等以合祠湫隘不足儼崇奉肅表章建言於僉憲李

公默曰忠簡公古今師表請特祠會城以示風厲都院
錢公如京題之卜基城西官巷付郡守鄒公守愚創之
郡丞程公鐸成之按院王公德湓書李忠簡祠扁於門
學憲吳公鵬重修宋理宗御賜久遠堂南方間氣扁於
堂有司春秋俱以丁後三日致祭與周濂溪陳白沙二
先生同日舉行萬曆二十八年庚子中貴李鳳來吾廣
權稅祠築為稅廨士論不平布政督學袁公茂英二十
九年三月備牌行府即喚李氏子孫推擇老成謹厚者

親董其役於社學舊基自捐俸與贖鍰修復二十九年
辛丑四月初三日始至三十年竣事首臺門次儀門兩
廊由廊而進曰南方間氣堂中八楹左右共十楹背傍
三面屏以板壁從板壁後入築砌甬道兩傍植柏二株
為久遠堂先公像妥焉兩廂房為子姓書舍從廂房內
進過一丹墀為誥書樓上閣下楹藏先公碑刻原像樓
外餘室為奉祠者所居右傍隙地列構小房為子姓應
試公館其前面鋪屋則祠之香火所從給也祠坐坎向

離背枕朝臺面臨珠海左控粵王故宫右引榕寺巍塔
仙湖九曜隱映簷前穗石坡山輝騰檻外禺峰東峙苛
苑西開誠足奉妥先靈矣顧自萬厯辛丑至今歷年僅
五十兵燹之後無屋不摧祠遂無存茂草荒烟可勝歎
哉

宋李忠簡公會城祠復賜田記

瑄朗採黃衷矩
洲文集增入表

南海人宏治進士終
官兵部侍郎字子和

夫士之道惟德與功國之報惟爵與祿後世之尊信而

崇奉者惟祀事是故士非抗榮望於當時而能永尊信
於後世者蓋寡矣宋侍郎李忠簡公敬義以居其德忠
節以昌其氣文藝以發其奇立朝之正儲貳之論儉相
之斥幸璫劾京尹引裾犯色擯落罔卹於汀之靖劇患
於鄉之縋城弭亂於閩之捐俸以賑於贛之罷官酤置
常平嚴保伍而民戴其惠峒酋安於導化而天下郡邑
趨良吏之風親喪雖終猶居墓次累詔而不起為師清
獻制心喪焉此其功德之大都耳封番禺開國男凡食

七邑賜田如千頃新安大奚山其一也迨我疆場吏政
龐敝田沒於豪右祠翳於海珠有位者若弗聞也嘉靖
丙申閩郡舉人倫諫梁津李鸞曾貫周懋德黎民表言
於李僉憲默曰忠簡公古今師表今海珠之祠鞠於榛
莽將毋以示憲請祠於會城風教可興矣李曰吾責也
以付郡守鄒守愚曰吾責也即城西官巷之官地築堂
三間拜亭閱域稱之督府錢公如京韙其舉郡貳程鐸
任其成巡院王公德溢大書揭於閱吳學憲鵬大書揭

於堂役昉於丁酉八月迄己亥秋九月而落光儀儼然
工制顏翰咸極精麗王仍括河南官渡之貲歲閏輸於
祠預葺也時鄉豪有私大奚田者且自實於官竅吏曰
官田也盍鬻諸公裔孫潯州太守翱比以禮部郎報政
及家奉公遺囑暨邑籍可覆案者進白於王先世錫田
不忍棄也敢固以請王曰義哉其割百畝以歸祠祭餘
可計值而有耳王以憂去聽於清戎察院即今大巡陳
公儲秀也業已報允然稍難於鉅值諸鄉大夫按司馬

溫公計康節遺宅故事寓書於陳舉人黃延年吳允裕
趙鶴隨拜竟其詞陳曰義哉移於蕭大叅晚陳少叅世
輔議再上於督府若大巡姚公虞乃汰其原值之半翻
得罄索以從事於是斯田悉登前籍之故矣姚復檄新
安縣卜以茲山形勝特營祠暨坊以彰名跡扁曰錫田
餘業庶村翁野豎歲時伏臘知虔事云衷曰屬予服茲
役也因廣其良知者四焉夫進德脩業所以鳴世也吾
是以知文溪高爵重祿所以勸世也吾是以知宋治祠

籌田畫往返累牘而不越乎義吾是以知秉彛黜也竭
貲戮力繼舊緒以傳先美盛德之後必昌且賢吾是以
知天道是為記

家廟成通省士夫祭文

維大明嘉靖七年歲次戊子孟冬己亥朔越十三日辛
酉同郡後學晚生黃褰區燦黃佐鍾善經梁廷振倫以
諒方茂夫江宇吳允裕馮徽陳中誠招宗廣趙鶴隨費
秉等敢昭告于宋龍圖閣待制尚書吏部侍郎兼翰林

院學士監修國史番禺開國男食邑三百戶謚忠簡李
公曰於維先生海邦鍾秀星耀垂祥生也非偶第及鼎
魁文章之首立朝不隨律已無疚忠孝義勇聲光宇宙
前修典型後學山斗嗟我秉彜瞻依良厚遺像豐碑子
孫世守勒之贊詞手澤猶舊祠宇未奉孰執其咎三台
高岡奇峰延袤僉曰祠之庶幾妥侑主之者誰斯文領
袖匪為其私實裨風教卜吉於茲聿新堂構樂奏希音
禮稱玄酒如見精神降陟左右尚饗

郡城祠有司春秋祭文

惟公豐功茂德照耀史冊流風餘韻啓我後人名教所
關實切企仰今茲仲春秋謹以牲醴用申常祭公其鑒之

修復李忠簡公海珠祠像記

賜進士出身翰林院編修文林郎兼經筵官同修國史
增城湛若水撰文

賜同進士出身廣東按察司僉事吳興顧應祥書丹
賜進士及第翰林院國史編修南海倫以訓篆額

正德十有二年三月之望庠生甘生劉生陳生拜進其
言於憲副汪公曰學相朝紀時維小子罔聞知嘗交於
李忠簡公文溪之孫庠生達元獲講其世蓋公世系在
譜牒勛業在國史文藝在本集罔敢有攸述仰惟公之
懿德大節發身鼎科立朝以正追斥安石乞正儲貳去
嵩之奸引裾抗疏劾盧董二宦落職而不悔曰忠喪其
親築室終制於墓若終其身累詔不起曰孝乞歸制服
心清獻之喪立師傅之道曰義幕於汀奮身諭賊以其

守免贊聞清獻絕城入諭賊壘出白刃下却摧鋒之變
而遠之廣郊曰勇提舉於閩捐俸賑饑活人之命守贛
置常平罷官酷嚴保伍以為民安曰惠屢進屢辭蚤能
以其身退曰廉夫斯六行者君子之所以立身也忠簡
備焉足為生人之表固宜里置血食焉以彰鄉先生之
道况海珠公之築也而下帷之地也其寺田公之所置
守也其祠置洪漕使從邦人之請公也乃反忘本而浮
屠焉徒據甚非所以繼往而示來也仰惟明公風化是

務復菊坡祠於南庠增飾文山祠於五坡學相朝紀等
誠不揣冒昧以言惟明公其圖之公曰鉉職也何辭乃
撤其居而新之肖其像而妥靈焉數百載之廢墜一朝
而復於是陳侍御言扁顏之毛侍御鳳請典祀之黃僉
憲昭申董之劉憲副伯秀資助之王僉憲大用設門役
以守之魏太守廷楫先後贊襄之番禺王知縣澄經營
之祠以地主寺以祠存復舊也汪公曰事已不可無記
記必於湛子或謂觀吏部霍進士韜亦曰必於湛子若

水曰義也吾不可辭郭太保總戎勛曰子其無辭焉吾
謹有供麗牲之碑督市舶牛大監榮至則曰復舊以明
義也因為加飾之嗚呼茲非忠簡公六美之實先得乎
人心之同然而能起人心於百世之下不期同而同然
者乎祠成公儼然臨之在上於是奸邪之臣觀之將愧
其忠薄子觀之將愧其孝師友操戈者觀之將愧其義
懦怯於難者觀之將愧其勇殘剝之吏觀之將愧其惠
貪進而無恥者觀之將愧其廉而後之忍心於廢興者

觀之將愧修復之諸君子也愧之何如修之而已然則是祠也其立教之本歟因為迎送神辭三章俾歲祀而被之樂歌鼓之舞之以盡神

悵靈寢兮多修服六美兮孰儔燦雲漢兮以為章招箕尾兮與同遊既容嫺兮多姱永貞則兮服休靈不來兮

予愁悵獨立兮中洲

右一

靈之來兮駕玄武乘北風兮下土先朱鳥兮前驅左蒼龍兮駢白虎薦溪毛兮玄尊明德馨兮簋簠呼天吳兮

總干紛江靈兮起舞

右二

日窅窅兮西沉雲冥冥兮霾陰四無畔兮莫杭靈胡去
兮駸駸悵獨立兮容與羌神往兮形存猗神往兮玄武
服兩駟兮入寒門瞻雲錦兮悅象將天飛兮莫予遺言
慨莫聞兮予顧馮夷鼓兮闐闐

右三

右迎送神辭三章二章八句一章章十有二句

皇明正德十三年戊寅八月九日立

海珠祠像成闔郡大夫祭文 王漸遠撰

嘗謂古今豪傑之士其名於世也雖其山川瑰奇跌宕之氣之所鍾而亦其進修精練蘊藉之所至譬之層巒列嶽峭昂削拔於數百里之區而其中之盤鬱儲衍者未嘗不易也譬之長江大河湍激洄洑於一瀉百折之下而其中之淵澄停蓄者未嘗不止也仰惟先生稟岐嶷之資毓間世之氣早師事於菊坡知琢磨之有自其養之虛也雖鼎魁天下而不以為高食邑實封而不以為意其立之勇也雖四疏劾奸而不以為疑絕城諭賊

而不以為異其守之介也雖逍遙於霜鶴秋竹之間而不以為孤徘徊於松根巖曲之際而不以為忌此先生名德卓行之見於世而不可議如此而其詩文之發磊落奇崛屈詰聳牙而率流於胸次謂非山川跌宕之所鍾而學問進修之所深詣者耶



文溪集卷末